

Headlines

1. मुख्यमंत्री उमर अब्दुल्ला होरें कश्मीर घाटी ते जम्मू खित्ते लेई स्याल रूतै दी तैआरिएं दा जायजा लैने लेई इक उच्ची सतह दी बैठक दी अध्यक्षता कीती।
2. डीआईजी श्रीधर पटेल ते एसएसपी रामबन होरें उस ग्रां दा दौरा लाया जित्थें दऊं ग्राम रक्षा कार्डें दी हत्तेया करी दित्ती गई ही।
3. रियासी दे जिला विकास आयुक्त होरें आरडीडी विभाग दे प्रदर्शन दा जायजा लैता ते पूरे आरडीडी अमले दी तनखाह पूरी पराती रिपोर्ट दर्ज कराने तोड़ी रोकने दा आदेश दित्ता।
- 4- राश्ट्रीय कनूनी सेवा दिवस अज्ज समूलचे देसा च मनाया जा'रदा ऐ।

<><><><><><>

CM Omar Abdullah

मुख्यमंत्री ओमर अब्दुल्ला होरें अज्ज सिविल सैक्रेटेरिएट च सरबंघत अधिकारिएं दी इक उच्ची सतह दी बैठक लाइयै स्याले दी रूतै दरान कश्मीर घाटी ते जम्मू संभाग दे स्याले आहले जोन हेठ पौंदे इलाकें च तैआरिएं दा जायजा लैता। उनें आखेआ जे योजनाएं गी बड़ा सोची-समझियै तैयार कीता गेदा ऐ ते हून इनें'गी बड़े असरदार ढंगै कन्नै लागू बी कीता जाना लोड़चदा ऐ। उनें आखेआ जे पैहली बर्फबारी दे कन्नै उंदिएं तैयारिएं दी परख बी होई जाहग। मुख्यमंत्री होरें आखेआ जे ऐल्लै जारी सोक्के आहली स्थिति दे चलदे पैहले गै केई चुनौतिएं दा सामना करना पवै करदा ऐ जि'दे च पानी दे स्तर च आई दी कमी, साह सरबंघी बमारियां ते बिजली दी घट्ट पैदावार ज्नेयी समस्यां मुख्ख तौर पर शामिल न। उनें आखेआ जे योजनाएं दा ऐलान कीते जाने दे बाद इंदी असरदार अमल-आवरी मती महत्वपूर्ण होई जंदी ऐ। स्यालें लेई तैयार कीती गेदी कार्य योजना च अंतर-जिला राजमार्ग सने जिलें ते कस्बें गी जोड़ने आहली सिड़कें गी खुल्ला रक्खना ते लाजमी सेवाएं दी बिजन कुसै दिक्कत दे दस्तयाबी जकीनी बनाया जाना शामिल ऐ।

<><><><><><>

Ramban Kishtwar

रामबन, किशतवाड़ ते डोडा रेंज दे डीआईजी श्रीधर पाटिल ते किशतवाड़ दे एसएसपी होरें अज्ज किशतवाड़ जिले दे कुन्तवारा ग्रां दा दौरा लाया जित्थे आतंकवादिएं दऊं ग्राम रक्षा गार्डें दी गोली मारियै हत्तेआ करी दित्ती ही। इस घटना दे बाद ग्रांS च सुरक्षा होर बधाई दित्ती गेदी ऐ तांजे कुसै होर माड़ी घटना गी होने थमां टालेया जाई सकै। आतंकवादिएं आसेआ कीते गेदे इस हमले दे बाद सुरक्षाबलें इस पूरे इलाके दी घेराबंदी करी रक्खी दी ऐ। मारे गेदे ग्राम रक्षा गार्ड ओहली-कुंतवारा ग्रां दे बसनीक हे। जंदे शुक्करवारें इनें दौनें दे शव ग्रां कन्नै लगदे जांगली इलाके थमां बरामद कीते गे हे जेहदे परैन्त फौज, सीआरपीएफ ते जम्मू-कश्मीर पुलिस आसेआ इलाके च सांझे तौर उपपर इक सांझा तपाशी अभियान चलाया गेआ।

<><><><><><>

DDC Reasi(byte)

रियासी दे जिला विकास आयुक्त विशेष महाजन होरें ग्रामीण विकास विभाग दे कम्में काजें दा बैठक च जायजा लैता। इस बैठक च एसीडी, बीडीआ पंचायत इंस्पैक्टर ते होरने अफसर शामिल हे। जवाबदेही ते वचनबद्धता पर जोर दिंदे होई महाजन होरें आरडीडी अमले आस्सेआ जि-चिर कम्में कारवाइएं दी व्यापक रिपोर्ट नेई सौंपी जाग उ-चिर उंदियां तनखाह फौरी प्रभाह कन्नै रोकने दे आदेश जारी कीते। इस दा मकसद ग्रामीण विकास योजनाएं गी असरदार ढंगै नै लागू कराना ते प्रगति जकीनी बनाना ऐ। बैठक दरान डीडीसी होर मनरेगा, पीएमएवाई(जी) ते कपेक्स माली परियोजना जियां एबीडीपी ते एपीडीपी दा बी बैठक च जायजा लैता। उनें सब्बे बीडीओएं गी हर म्हीने दे साहबै घट्टोघट्ट 13 दिनें आपूं थाहर पर पुज्जियै जायजा लैते दा बी निर्देश दित्ता। उनें आडिट रिपोर्ट दा बी जायजा लैता ते बीडीओएं गी समें सिर कम्में गी पूरा सबूरा करने दे निर्देश दित्ते। आकाशवाणी कन्नै गल्ल करदे होई उनें आखेआ

<><><><><><>

Vice President Education

उपराष्ट्रपति जगदीप धनखड़ होरें अज्ज आखेआ ऐ जे विकसित राष्ट्र दा लक्ष्य हासल करने च शोध ते नमिआं काड्डां मती महत्त्व आहली भूमिका निभांदिआं न। श्री धनखड़ होरें अज्ज नमीं दिल्ली च राष्ट्री प्रौद्योगिकी संस्थान एन.आई.टी. दे चौथे दीक्षांत समारोह गी संबोधित करदे होई आखेआ जे शोध ते नमिएं काह्डें दे खेत्तरें च राष्ट्र दा उच्चा स्तर आलमी बिरादरी च ओह्दी स्थिति गी दर्शांदा ऐ। उनें आखेआ जे शैक्षिक संस्थानें गी शोध ते नमिएं काह्डें लेई अपनी समर्थ दा पूरा-पूरा इस्तेमाल करना लोड़चदा ऐ। श्री धनखड़ होरें कॉर्पोरेट घरानें गी इस खेत्तर च महत्वपूर्ण जोगदान देने लेई आखेआ। उनें आखेआ जे बपार, उद्योग, ते कारोबारी संगठनं गी शोध ते नमिएं काह्डें लेई खुल्लै दिलै कन्नै माली जोगदान देना चाईदा ऐ। उपराष्ट्रपति होरें आखेआ जे शिक्षा च निवेश समाज सेवा दा महत्वपूर्ण उपकरण ऐ जेह्दे'नै मनुक्खी संसाधन मता समृद्ध होंदा ऐ ते मजूदा समें ते भविक्ख बी सुरक्षित बनदा ऐ। उनें आखेआ जे शिक्षा असल च समाज सेवा ऐ। उनें जोर देइयै आखेआ जे शिक्षा गी बपार दे तौर पर नेई दिक्खेआ जाना चाईदा सगुआं एह् इक जिम्मेदारी ऐ।

<><><><><><>

Banihal JJM (byte)

रामबन जिले दे बनिहाल सब-डिवीजन च जल जीवन मिशन दे तैह्त् साड्डे 7 करोड़ रुपें दी अंदाजन लागत कन्नै गुंड-अदालकोट पानी सप्लाई स्कीम दा कम्म जल शक्ति विभाग नै सबूरा कीता ऐ जेह्दे'नै मुकामी लोकें गी बड्डी राह्त् हासल होई ऐ। इनें लोकें पीने आहले पानी दी समस्या दा नबेड़ा करोआने लेई सरकार, लेफ्टिनेंट गवर्नर, डीडीसी काउंसलर ते जल शक्ति विभाग दा आभार जताया ऐ। केई दहाकें दे इंतजार दे मगरा, बनिहाल दी गुंड – अदालकोट-ए पंचैत दे बक्ख-बक्ख ग्राएं च रवै करदे परोआरें गी उंदे घरे कश पीने आहला पानी हासल होआ ऐ ते एह् सब किश केन्द्र सरकार दी तरफा रम्मे गेदे जल जीवन मिशन दी बदौलत मुमकन होई सकेआ ऐ। भारत सरकारै ब'रे 2019 च हर घर जल योजना रम्भी ही जेह्दा मकसद जल जीवन मिशन दे तैह्त् ब'रे 2024 तगर हर इक ग्रामीण परोआर गी नलके राहें पीने दा पानी उपलब्ध करोआना हा। इस बारै आकाशवाणी समाचार कन्नै चेची गल्ल करदे होई ग्रां दे इक बसनीक नै गलाया

<><><><><><>

Tobacco Campaign (byte)

नौजवानें गी तम्बाकू दे माड़े नतीजें बारै जानकार बनाने दे मकसद कन्नै जीएमसी कठुआ दे एएमटी स्कूल आसेआ इक जागरुकता रैली कड्डी गई। इस मौके एएमटी स्कूल दे विद्यार्थिएं हत्थें च तख्त्रियां ते बैनर फगड़े दे हे ते इंदे राहें उनें लोकें गी तम्बाकू दे माड़े असर बारै जागरुक बनाया। विद्यार्थिएं इस मौके उप्पर इक नाटक बी पेश कीता ते एह्दे राहें बी उनें लोकें ते खासतौर उप्पर नौजवानें गी तम्बाकू करी होने आहले खबरें दा संदेस दित्ता। आकाशवाणी समाचार कन्नै इस बारै खास गल्ल करदे होई कठुआ दे सीएमओ डाक्टर विजय रैना होरें आखेआ

<><><><><><>

National Legal Service Day

अज्ज देश भरै च राष्ट्रीय कनूनी सेवा सरबंधी ध्याड़ा मनाया जा'रदा ऐ। लोकें च कनूनी जागरुकता बधाने ते सब्ब नागरिकें खास करियै हाशिये पर रवा'रदे समुदायें दे लोकें लेई न्याह् तोड़ी पुज्ज जकीनी करने लेई एह् ध्याड़ा मनाया जंदा ऐ। इक न्याह् समाज दे निर्माण लेई केई परियोजना ते गतिविधिएं राएं विवाद दे हल लेई तंत्र गी बढ़ावा देने ते लोकें गी उंदे कनूनी हक्क हकूकें बारे जागरुक करने लेई एह् ध्याड़ा मनाया जंदा ऐ। वंचित ते हाशिये पर रवा'रदे लोकें गी कनूनी मदद देने दे मकसद कन्नै 9 नवम्बर 1995 गी कनूनी सेवा प्राधिकरण अधिनियम बनाया गेआ। इस ऐतिहासक कनून दे नतीजे करी 5 दिसम्बर गी राष्ट्रीय कनूनी सेवा प्राधिकरण दी स्थापना कीती गई अदू थमां गै राष्ट्रीय कनूनी सेवा सरबंधी ध्याड़ा हा ब'रे मनाया जंदा ऐ।

<><><><><><>

जिला कनूनी सेवा प्राधिकरण पुंछ आस्सेआ तैहसील कनूनी सेवा कमेटी दे सैहयोग कन्नै अदालती परिसर पुंछ च कनूनी जागरूकता कार्यक्रम दा सरिस्ता कीता गेआ। एहदा सरिस्ता जिला कनूनी सेवा प्राधिकरण दे अध्यक्ष अश्विनी कुमार शर्मा हुंदी दिक्ख-रिक्ख ते सचिव रफाकज हुसैन हुदं मार्गदर्शन हेठ कीता गेआ। एहदा मकसद प्रतिभागिएं गी 1987 आले कनूनी सेवा प्राधिकरण कनून ते उंदे कनूनी अधिकारें बारे जानकारी बनाना हा। इस कनून दा मकसद इस गल्लै गी जकीनी बनाना ऐ जे कुसै बी नागरिक गी आर्थिक जां कुसै होर परेशानी दे चलदे न्याह थमां खुंजना नेई पवै।

<><><><><><>

DDC Chairperson Poonch (byte)

जिला विकास काउंसल पुंछ दिएं अध्यक्ष तजीर अख्तर होरें 2024-25 आहले माली ब'रे लेई केपैक्स बजट तैहत हासल प्रगति दी समीक्षा लेई इक व्यापक जायजा बैठक लाई जेहदे च पुंछ दे डिप्टी कमिशनर विकास कुंडल हुंदे सने बक्ख-बक्ख मैहकमें दे आला अधिकारिएं बी हिस्सा लैता। बैठक दरान तजीम अख्तर होरें टेंडर कड्डने दी प्रक्रिया गी तेज करने ते विकास प्रोजेक्टें दी रफतार बधाने दी जरूरतै पर जोर पाया। उनें आखेआ जे इनें परियोजनाएं गी बेल्ले सिर सबूरा करना अत्त लाजमी ऐ कीजे ईआं करियै जिले दे पूरे-पराते विकास गी जकीनी बनाया जाई सकदा ऐ। पुंछ दे डिप्टी कमिशनर विकास कुंडल होरें इस मौके पर जिले च जारी परियोजनाएं बारै जानकारी दित्ती ते ओकड़े खेत्तरें पर लोऽ पाई जित्थे प्रगति हासल कीती गेदी ऐ। आकाशवाणी समाचार कन्नै खास गल्लबात करदे होई डीडीसी तजीम अख्तर होरें आखेआ

<><><><><><>

School Education

कश्मीर दे स्कूली शिक्षा विभाग दे डरैक्टर तस्सदुक हुसैन मीर होरें अज्ज आखेआ ऐ जे ओह पैहली थमां लेइयै 9मीं जमात तोहड़ी दे सलाना म्तेहानें गी पूरे पेशेवर तरीके कन्नै दिसम्बर म्हीने दे अदद तोहड़ी करोआई लैते जाडन। इस बारै पत्रकारें कन्नै गल्ल करदे होई डरैक्टर होरें आखेआ जे ओह पैहली थमां 9मीं जमात तोहड़ी दे बच्चे लेई इक्कै नेयी डेट शीट बी जारी करडन। उनें दस्सेआ जे उनें पैहली शा लेइयै 9मीं जमात तोहड़ी दे म्तेहान करोआने सरबंधी प्रस्ताऽ जमा करोआए दा ऐ ते उनें'गी मेद ऐ जे दिसम्बर म्हीने दे अदद तोहड़ी एह म्तेहान करोआई लैते जाडन तांजे विद्यार्थी अगले स्तर लेई अपनी तैयारी अगेत्रे शुरु करी सकन। उनें विद्यार्थिएं गी गुजारिश कीती जे ओह पाठ्यक्रम पूरा नेई होने गी लेइयै कुसै किस्मै दा कोई दबाऽ नेई लैन। उनें आखेआ जे उनें'गी पाठ्यक्रम दे बारै च पूरी जानकारी ऐ ते 90 फीसद पाठ्यक्रम पूरा करी लैता गेदा ऐ। उनें विद्यार्थिएं गी आखेआ जे ओह बिल्कुल बी घाब्बरन नेई कीजे एह म्तेहान ऐसे सरिस्ते राहें करोआए जा'रदे न जेहड़ा विद्यार्थिएं दे मता अनुकूल होग।

<><><><><><>

Gopalshtami(byte)

बाकी मुल्ले आला लेखा जिला संबा च बी गोपाश्टमी गड़ी गै धार्मिक श्रद्धा कन्नै मनाई जा'रदी ऐ। इस ध्याड़े महिला गो-माता दी पूजा करदे न ते उंदी आरती करदियां न। आकाशवाणी कन्नै गल्ल करदे होई शीतल शर्मा होरें आखेआ

<><><><><><>

Pakistan Blast

पाकिस्तान दे बलोचीस्तान च क्वेटा रेलवे स्टेशन दे कोल इक धमाके दे बाद बड़े मते लोकें दे मरोने ते केई सारे लोकें दे जख्मी होने दी खबर ऐ। धमाके दे समें इक रेलगड्डी प्लेटफार्म शा पेशावर लेई रवाना होने आली ही। पुलस ते बचाह दल मौके पर पुज्जी गे।

<><><><><><>

